

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXVIII Blg. 18  
Setyembre 21, 2007  
www.philippinerevolution.org

*Editorial*

# Sukdulan ang galit ng mamamayan sa pandarambong ng rehimeng US-Arroyo

**A**bot-langit na ang galit ng mamamayang Pilipino sa rehimeng US-Arroyo. Sa kabila ng sagad-sagarang kahirapan ng mamamayan, pagkasaid ng yaman at pagkasadsad ng ekonomya ng bansa, walang kabusugan ang pandarambong at labis-labis na ang pagpapakabundat ng pamilyang Arroyo, kasabwat ang malalaking burukrata ng rehimen at dayong malalaking kapitalista.

Lalo pa ngayong nagtutungan ang apoy ng galit ng bayan sa pagpasok ng kampong Arroyo sa labis na maanomalyang kontrata sa National Broadband Network (NBN) at pagbalsa nito ng \$130 milyong suhol mula sa ZTE Corporation ng China.

Ang \$329 milyong kontratang NBN ang isa na sa pinakamalalaking kaso ng korapsyon. Sinasapawan nito ang napakarami nang malalaki ring kaso ng pangungulimbat sa kabang-bayan: mula sa pagtanggap ng \$14 milyong kikbak sa IMPSA-Caliraya Project hanggang sa pangungurakot sa konstruksyon ng P1.1 bilyong Diosdado Macapagal Boulevard at sa paglilimas ng P2.8 bilyong pondo ng Ginintuang Masagang Ani Program.

Katulad ng maraming kaso sa nakaraan, tuwirang sangkot si Gloria Arroyo sa kontratang NBN, gamit ang kanyang asawang si Mike. Kahati rin nila ang ka-


nilang pinakamalalapit na matataas na upisyal na tumanggap ng kani-kanyang bahagi ng suhol. Pangunahin dito ang pinuno ng COMELEC na si Benjamin Abalos, at mga upisyal ng gabinete.

Sa paglubog ng naghaharing sistema sa palalim nang palalim na krisis, lalong nagiging

hayok ang naghaharing kampong Arroyo sa pangungulimbat. Daig na nito ang lahat ng mga kaso ng paganakaw sa nakaraan. Nagkukumahog itong samsamin ang lahat ng pwede nitong samsamin habang nakaupo sa Malacañang at gamitin ang lahat ng kapangyarihan para tumagal pa sa poder at lalo pang makapangulimbat.

Ang walang kasapatang kahayukan ng naghaharing rehimeng Arroyo sa pandarambong ay palatandaan ng papakitid na pakinabang na napipiga ng mga naghaharing uri dulot ng lalong tumitinding krisis at paglilimas sa kayaman ng bayan. Hindi na ito maaaring payapang paghatian ng mga reaksyunaryong kampong nakaupo at wala sa poder.

Maging ang mismong mga alipures ni Arroyo ay walang tigil na sa girian sa pagbubulsa ng pinakamalalaking pakinabang. Kitang-kita ito sa pag-uunahan ng malalaking burukratang kaalyado ni Arroyo sa kani-kanyang pagbubulsa ng bilyun-bilyong pisong suhol para maitulak at mailusot ang maanomalyang



***Mga tampok sa isyung ito...***

**Proyektong NBN: patung-patong na kurakot** PAHINA 4

**Paglaya ni Ka Joema, malaking sampal kay Arroyo** PAHINA 5

**Ekonomya ng US patungong resesyon** PAHINA 9

kontratang NBN.

Bunga nito'y palaki nang palaki ang lamat sa hanay ng naghaharing reaksyunaryong kampo ni Arroyo. Ang nagbabadyang bangga ng pangunahing mga pinuno ng naghaharing reaksyunaryong koalisyon ay tanda ng lalo pang pagkitid ng kampong Arroyo at pagkakahimalay nito sa mamamayan.

Ang gayong girian at bangga sa hanay ng mga naghaharing uri ay maliwanag na nagpapatunay sa mamamayan na bulok sa kaibuturan ang umiiral na sistema ng paghahari sa bansa. Sumasabog na ang dibdib ng mamamayang Pilipino sa sukdulang galit sa walang hangganang pandarambong ng bulok at kinamumuhang rehimen. Lalong tumitibay ang kanilang determinasyon na waksan na ang rehimen US-Arroyo at ang buong naghaharing sistema.

Makailang ulit nang hinatulan ng sambayanan ang rehimen US-Arroyo sa mahaba at madugong listahan ng mga krimen nito laban sa mamamayan. Masidhi ang kanilang hangaring parusahan ang rehimen nagpapahirap sa

bayan. Ang galit at determinasyong ito ang ngayo'y pumapanday sa kanilang malawakang pagkakaisa at nagtutulak sa kanila na humugos sa lansangan at gawin itong panibagong larangan ng labanan. Itinutulak nito ang mga rebolusyunaryong pwersa na lalong pag-ibayuhin ang armado at di armadong mga paglaban.

Dapat samantalain ng mamamayan ang ibayong kaguluhang kinakaharap ng naghaharing pangkating Arroyo. Dapat hikayatin ang lahat ng reaksyunaryong handang tumalikod sa bulok na rehimen na makipagkaisa sa bayan sa kanilang hangaring waksan ang paghahari ng mga magnanakaw at mandarambong at bigyang-daan ang pagtatayo ng bagong gubyernong magtataguyod sa interes ng mamamayan.

Sa katuus-tuusan, ang mamamayang Pilipino ang tagahatol ng kanilang kasaysayan. Hinusgahan na nila ang mga nagdaang krimen sa nagdaang EDSA 1 at EDSA 2. Magagawa rin nila ito laban kina Arroyo at kanyang mga kasapangkat. Sa malao't madali ay maibabagsak sila at mapananagot sa lahat ng kanilang krimen. **AB**


# Mamamayan ang hahatol

Isang malaking kabulastugan na si Joseph Estrada ay hinatulang nagkasala sa kasong pandarambong ng isang rehimen di hamak na mas marami at mas mabibigat ang krimen. Idinidiin ng paghatol na ito ang kagyat na pangangailangang parusahan mismo ang naghaharing rehimen sa mas nakaririmarim na mga krimen nito.

Kung tutuusin, walang-wala sa katayuan si Gloria Arroyo na maghusga at maggawad ng katarungan sa mga kasong pandarambong na isinampa laban kay Estrada. Malaon nang nasapawan ng higit na mabibigat at maraming krimen ni Arroyo at kanyang mga alipures ang mga kaso ng pinatalsik na pangulo.


Hanggang sa huli, ginamit ng Malacañang ang paglilitis kay Estrada upang siya'y ipitin at piliting makipagkasundo. Isinangkalan ni Arroyo ang pagpapatunay ng kawastuan ng EDSA 2 upang tuluyan nang isaisantabi si Estrada, pagkaitan siya ng rekursu at hadlangan ang kanyang pagsuporta sa malawakang panawagan at mga pagkilos para waksan ang naghaharing pangkatin.

Sa paghatol kay Estrada, tuluyan nang isinara ni Arroyo ang lahat ng daan para magkasundo ang dalawang pangunahing magkaribal na kampong reaksyunaryo. Lalo niyang pinalalim ang hidwaan sa pagitan ng naghaharing rehimen at pampulitikang oposisyon, at pinaigting ang antas ng karahasang paksyunal. Lalong hihina at mayayanig ang naghaharing bangkaroteng sistema sa ibubunga nitong madugong salpukan sa hanay ng

 Taon XXXVIII Blg. 18 Setyembre 21, 2007  Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles. Maaari itong i-download mula sa Philippine Revolution Web Central na matatagpuan sa: <a href="http://www.philippinerevolution.org">www.philippinerevolution.org</a> Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: <a href="mailto:angbayan@yahoo.com">angbayan@yahoo.com</a>	
<b>Nilalaman</b>	
<b>Editoryal</b>	<b>1</b>
Proyekting NBN:	
Patung-patong na kurakot	<b>4</b>
Paglaya ni Ka Joema, sampal kay GMA	<b>5</b>
Lider maralita sa Antipolo, pinaslang	<b>5</b>
OBL 2: Gumagatong ng rebolusyon sa Bikol	<b>5</b>
Mga bayaning medik	<b>8</b>
Ekonomya ng US, patungong resesyon	<b>9</b>
Hatak ng krisis sa US	<b>11</b>
<b>Balita</b>	<b>12</b>

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

# Habambuhay na pagkabilanggo



**H**a b a m - buhay na pagkabilanggo ang hatol ng special division ng Sandiganbayan noong Setyembre 12 kay dating Presidente Joseph "Erap" Estrada sa kasong pagdambong ng P4.097 bilyon. Ibinalik si Estrada sa bimbining "rest house" sa kanya sa Tanay, Rizal.

Kabilang sa kaso ng pandambong ni Estrada ang pagtanggap ng P540 milyon mula sa hweteng na sinasabing idineposito sa bangko sa ilalim ng alyas niyang "Jose Velarde" at inilagag sa Erap Muslim Youth Foundation at pagkurakot ng tobacco excise tax.

Magsasampa ng "motion for reconsideration" ang mga abugado ni Estrada para kwestyunin ang desisyong ito. Mag-aapela rin sila sa Korte Suprema.

Ayon sa Plunder Watch, grupong sumusubaybay, naglalantad at bumabatikos sa malalaking kaso ng pandambong, matindi ang magiging epekto sa kasalukuyang rehimen ng pagkakakulong ni Estrada. Lalo nitong itutulak ang mamamayan na igiit ang pagparusa kay Arroyo na humaharap sa mas malalaking kaso ng pandambong.

Sa sobrang takot ni Gloria Arroyo sa maaaring maging reaksyon ng mga tagasuporta ni Estrada sa hatol, umabot sa 6,000 pulis at sundalo ang idineploy niya sa buong Kamaynilaan. Nagmistulang garison ang Malacañang sa mga nakapaligid na militar at nakabarikadang *barbed wire*, tangke at *container van*.

**"Mamamayan..." mula sa pahina 2**

mga reaksyunaryo.

Inaakala ni Arroyo na magagamit niya ang hatol kay Estrada para makapagpaganda pa ng papel sa harap ng mamamayang suklam na suklam na sa mga kabulukan, panlilinlang at pandarahas ng kanyang rehimen at ng buong sistema ng guberno.

Pero malaon nang itinuturing

ng nakararaming mamamayan na pinakakorap at pinakabulok na ngayon sa lahat ng mga reaksyunaryo sa bansa ang pamilyang Arroyo. Sa kadulu-duluhan, ang mamamayang Pilipino ang hahatol sa mga krimen ng kasalukuyang rehimen. Sila rin ang maggagawad ng kaparusahan sa lahat ng mga mandambong at kriminal na nagpapahirap, nang-aapi at sumusupil sa kanila.

## CAFGU, dinisarmahan sa ComVal

**A**nim na armas ang nakumapiska noong Setyembre 9 ng mga Pulang mandirigma ng Armando Dumandan Command (Front 33 Operations Command ng Bagong Hukbong Bayan sa Mindanao) mula sa mga elemento ng CAFGU na nagsisilbing pribadong hukbo ng Li Chiang Veneer Plant sa Dau-man, Montevista, Compostela Valley. Nakasamsam ang mga gerilya ng isang M16, isang M14, isang karbin, isang garan, isang *shotgun* at isang .38 kal. pistola. Isang elemento ng CAFGU na nagtangkang lumaban ang namatay.

Ayon kay Ka Marcella Valiente, tagapagsalita ng Armando Dumandan Command, isinagawa ang operasyong disarm para parusahan ang kumpanya sa aktibo nitong pagsuporta sa AFP at paggamit sa mga *goons* para takutin ang mga residente ng lugar.

AB



## Patung-patong na kurakot

Umaabot sa \$130 milyong (o ₱6.5 bilyon) “komisyon” ang nakatakdang ibulsa ni Gloria Arroyo at kanyang mga kasapakat oras na matuloy ang \$329 milyong kontratang National Broadband Network (NBN) sa pagitan ng gubyernong Arroyo at ng ZTE Corporation ng China. Ang impormasyong ito ay kabilang sa mga nabunyag sa mga isinasagawang pagdinig ng Senado hinggil sa NBN.

Ayon kay Jose “Joey” de Venecia III, negosyanteng anak ni Speaker Jose de Venecia, sangkot mismo sa negosasyon at pagtitiyak ng kontrata ang asawa ni Gloria Arroyo na si Mike Arroyo. Tinukoy din niya si COMELEC Chairman Benjamin Abalos Sr. bilang pangunahing nag-eendorso ng ZTE Corp. at tagalakok ng suhol sa mga upisyal ng gubyerno.

Ang kumpanya ng nakababatang de Venecia, ang Amsterdam Holdings Inc. (AHI), ay nagsumite ng proposal sa Department of Transportation and Communication (DOTC) noong Disyembre 2006 para hawakan ang proyekto ngunit hindi ito pinaboran kahit ang isinumite nitong proposal ay walang kaakibat na gastos o utang para sa gubyer-

no. Sa pagtaya ni de Venecia, nagkakahalaga lamang ng \$200 milyon ang proyekto. Umabot ito ng \$329.4 milyong (₱16 bilyon) dahil sa patung-patong na kikkak para sa iba’t ibang upisyal.

Ayon kay de Venecia, inalok siya ni Abalos ng \$10 milyong kapalit ng pag-atras ng AHI sa proyekto, bagay na hindi niya tinanggap. Nagpursige siya sa aplikasyon niya sa DOTC, na ikinagalit naman ni Abalos.

Bandang Marso 2007, nagpatawag ng “pagpupulong” si Sec. Leandro Mendoza ng DOTC upang plantsahin ang gusot sa pagitan nina Abalos at de Venecia. Sa pag-uusap na iyon sa Wack-Wack Golf and Country Club sa Mandaluyong City ay dumating si Mike Arroyo. Ayon kay de Venecia, nilapitan siya ni Arroyo, dinuro at sinigawan ng “back off” upang sindakin siyang umatras na sa proyekto. Dumalo rin sa pulong na iyon sina Jimmy Paz, tauhan ni Abalos; Quirino dela Torre, dating upisyal ng pulis at *security staff* ni Abalos; Ruben Reyes, isang negosyante; at Leo San Miguel.

Sa layuning sindakin ang mga senador, lunurin ang isinasagawang imbestigasyon at kontrahin ang testimonya ni de Venecia, dinumog ng mga kagawad ng gabinete ni Arroyo ang Senado nitong Setyembre 20. Dumalo doon magiging si Executive Secretary Eduardo Ermita.

Gayunpaman, sa kabila ng pagsisi- kap ng mga tauhan ni Arroyo na ilako ang NBN, mas marami pang anomalya sa pagpoproseso

ng proyekto ang lumitaw sa imbestigasyon. Lalo lamang ding nasuhayan ang naunang testimonya ng nakababatang de Venecia III hinggil dito. Lumabas na maraming hindi nasunod na rekisito sa pagbibigay ng proyekto ng NBN sa ZTE kabilang ang kabiguang kumuha ng pahintulot ng Kongreso at ng Monetary Board bago pirmahan ang kasunduan sa utang sa ZTE.

Napilitan ding umamin si DOTC Secretary Mendoza na naganap nga ang sinasabi ni de Venecia na pag-uusap sa Wack-Wack bagamat nagpalusot si Mendoza na nagkataon lang daw ang pagkikitang iyon at walang pandudurong nangyari. Taliwas naman ito sa testimonya ni Margarito Teves na nagsabing inanyayahan siya roon ni Mendoza.

Anuman ang paghuhugas-kamay ng kampong Arroyo ay bakas na bakas ang kanilang pagkakasangkot sa anomalya. Bisperas ng imbestigasyon ng Senado ay umalis ng bansa si Mike Arroyo, bagay na kinundena ng ilang senador bilang palatandaan ng kanyang pagkakasala.

Samantala, litaw na litaw na ang bitak sa hanay ng naghaharirang koalisyon na kinabibilangan pangunahin ng mga partidong Lakas-CMD na pinamumunuan ni Speaker Jose de Venecia at partidong KAMPI na pinamumunuan ni Gloria Arroyo. Kinagabihan ng pagbubunyag ng nakababatang de Venecia sa Senado noong Setyembre 18, nagpulong sa Malacañang ang 130 alyadong kongresista matapos sila imbitahan ng magkapatid na Mikey at Dato Arroyo, mga kongresistang anak ng mag-asawang Arroyo. Muling binuhay dito ni Kong. Pablo Garcia ng Cebu ang planong patalsikin sa pwesto si Speaker Jose de Venecia. Dati nang natalo ni de Venecia si Garcia sa botohan sa pagka-speaker. AB



# Paglaya ni Kasamang Joema, malaking sampal sa rehimeng US-Arroyo

**A**ng pagpapalaya kay Kasamang Jose Maria Sison “ay isang tagumpay para sa mamamayang Pilipino at mga rebolusyonaryong pwersa, isang malaking sampal sa rehimeng US-Arroyo at isang matinding dagok sa pasistang mga pakana ng National Security Council.” Gano ang pahayag ng Partido Komunista ng Pilipinas (PKP), isang araw matapos palayain si Kasamang Joema mula sa kulungan sa The Netherlands.

Ang pagpapalaya kay Ka Joema nitong Setyembre 13 ay iniutos ng The Hague District Court matapos mabigo ang pulisyang Dutch na magpakita ng sapat na ebidensya sa akusasyon nitong iniutos o “sinulsulan” man lamang ni Sison ang Bagong Hukbong Bayan (BHB) na patayin sina Romulo Kintanar noong 2003 at Arturo Tabara noong 2004. Labimpitong araw na ikinulong si Sison sa bartolina sa Scheveningen Penitentiary sa The Hague .

Nagpahayag ng kagalakan si Ka Joema sa kanyang paglaya. “Labis na pasakit at pagpapahiya ang ikinulong sa bartolina at isailalim sa matinding interogasyon nang nakaharap sa napakainit na ilaw. Lalo itong masakit dahil ako’y walang kasalanan sa gawa-gawang mga reklamong isinampa na may pam-pulitikang motibasyon.”

Binatikos ng PKP ang sabwatan ng gubyernong Arroyo at gubyernong Dutch na ikinoordina ng mga ahensyang paniktik ng US sa paghahanda ng malisyosong kaso laban kay Ka Joema. Ayon sa kanya, “Nagpauto ang gubyernong Dutch dahil sinulsulan ito ng US.”

“Tuloy ang laban!” Ito naman ang giit ng daan-daang nagrali sa Liwasang Bonifacio nitong Setyembre 14. Ang rali ay pinangunahan ng Bagong Alyansang Makabayan (BAYAN). Bilang pagdiriwang sa paglaya ni Ka Joema, inilunsad ng BAYAN ang isang programa ng pagbabasa at pag-awit ng mga tu-

la ni Ka Joema.


Ayon sa BAYAN, sa loob ng 17 araw na nasabartolina si Ka Joema ay umabot sa 29 na kilos-protesta ang inilunsad sa iba’t dako ng daigdig at libu-libong protestang *email, fax* at *online* na mga lagda ang dumagsa sa mga embahada at konsulada ng The Netherlands.

Hindi pa natatapos ang mga maitim na pakana ng gubyerno ng The Netherlands dahil nagsampa ng apela ang prosekusyon. Nitong Setyembre 16 ay dumating sa bansa ang anim na imbestigador ng gubyernong Dutch upang makipag-ugnayan sa gubyernong Arroyo tungkol sa kasong ito.

Kaugnay nito, todo-todo rin ang paghahanda ng panel ng mga abugado ni Ka Joema upang salagín ang anumang pakanang pang-gigipit ng rehimeng Arroyo at mga imperyalistang Dutch at US.

Nanawagan naman ang Free Ka Joema Campaign sa mga tagasuporta ni Sison sa buong mundo na maging mapagmatyag at biguin ang anumang pakana ng tatlong nagkukutsabahang gubyerno. Nanagako naman si Ka Joema na magpapatuloy siya sa kanyang pakikibaka para sa pambansang kalayaan, karapatang-tao, katarungang panlipunan at matagalan at makatarungang kapayapaan.

Samantala, sa isang liham sa gubyernong Norwegian nitong Setyembre 19, humingi ng tulong ang NDFP para mabawi ang mga doku-



mento at kagamitan na iligal na sinamsam mula sa upisina ng NDFP at mga bahay ng istap nito. Dumulong ang NDFP sa gubyernong Norwegian dahil ito ang nagsisilbing tagapamagitan sa usapang pangkapayapaan.

Ayon kay Fidel Agcaoili, tagapangulo ng NDFP Monitoring Committee, walang kinalaman sa kaso laban kay Ka Joema ang mga sinamsam na kompyuter at iba pang kagamitan. Kinumpiska ng mga pulis na Dutch ang lahat ng mga kompyuter, *laptop*, *USB disk*, *CD*, *diskette*, kamera at *MP3 player* kasama ang lahat ng mga dokumento at papeles kaugnay ng usapang pangkapayapaan. Kinumpiska rin ang rekord ng mga kaso na isinampa sa Human Rights Monitoring Committee ng NDFP at lahat ng komunikasyon sa pagitan ng mga myembro nito at ng Joint Secretariat.

Ayon kay Agcaoili, lubhang nappektuhan ang operasyon at trabaho ng upisina ng NDFP dala ng mga brusko at iligal na hakbang ng pulisyang Dutch. Gayundin, isinapananib nito ang libu-libong mga biktima ng paglabag sa karapatang-tao na nagbigay-tiwala sa usapang pangkapayapaan at operasyon ng Joint Monitoring Committee.

AB



## Lider maralita, pinaslang sa Antipolo

**P**atuloy ang pagtarget ng mga berdugo ng rehimeng Arroyo sa mga militanteng lider masa. Pinakahuling nakalap ng *AB* ang ulat hinggil sa pagkakapaslang ng isang lider ng mga maralita sa lunsod sa Antipolo. Bago ito, dalawang magsasaka ang dinukot sa Batangas at Cagayan. Nagpapatuloy din ang panggigipit ng AFP sa mga residente ng dalawang barangay sa North Cotabato.

**Setyembre 20.** Pinaslang ng tatlo hanggang limang berdugo si Marica Mondejar, 61, presidente ng Akbay Maralita Lungsod ng Silangan Townside Reservation. Pinagbabaril siya habang sakay ng isang van na bumabagtas sa Marcos Avenue, Antipolo City. Nagtamo siya ng maraming tama ng bala sa ulo at katawan.

Nang paslangin siya ay aktibong nangangampanya si Mondejar para sa karapatan ng mga setler na okupahin ang umaabot sa 20,000 ektaryang lupain sa Antipolo, at sa mga bayan ng San Mateo at Rodriguez sa Rizal.

Kinagabihan, apat na myembro ng Anakbayan ang dinampot ng pulisya sa Antipolo City. Inaresto sina Christian Concho, Bienvenido Cardona, Rizalde Rega at Jerry Armero dahil nagsabit sila ng mga istrimer sa Sumulong Highway bilang paggunita sa ika-35 aniber-

saryo ng batas militar.

**Setyembre 5.** Labingwalong residente ng Parola Compound sa Tondo, Maynila ang ilegal na inaresto at tinortyur ng mga elemento ng Philippine Army-National Capital Regional Command (NCR). Labimpito sa mga biktima ay mga menor de edad at ang isa ay 21 taong gulang.

Pilit silang pinaaming mga kasapi sila ng "Black Terrorist Mafia," isang gang sa Tondo.

**Setyembre 3.** Dinukot ng mga pinaghihinalaang tauhang militar si Manolito Serrano, 43, dating upisyal ng Samahan ng Magbubukid ng Batangas (SAMBAT). Huling nakita si Serrano sa Barangay Mapika, Calatagan, Batangas nang samahan niya ang isang kaibigan sa ospital. Iti-

natanggi ng pulisya at militar sa Batangas na hawak nila si Serrano.

**Setyembre 2.** Ilegal na inaresto ng mga elemento ng 17th IB si Jacinto de la Cruz, residente ng Barangay Carrupian, Baggao, Cagayan. Si de la Cruz ay aktibong kasapi ng Caguimongan, panrehiyong alyansa ng mga magsasaka sa Cagayan Valley at alyadong organisasyon ng Katipunan ng mga Magbubukid ng Pilipinas (KMP). Si de la Cruz ay inaakusahan ng militar na myembro ng Bagong Hukbong Bayan. Nakadetina siya ngayon sa himpilan ng 17th IB sa Barangay Masin, Alcala, Cagayan.

**Unang linggo ng Setyembre hanggang sa kasalukuyan.** Sapilitang pinapasok at hinahalughog ng mga elemento ng 40th IB ang mga bahay ng mga inaakusahang tagasupporta ng BHB sa mga baryo ng Midpapan Uno at Midpapan Dos sa Pigcawayan, North Cotabato. Ayon sa mga biktima, nagkukunwari ang mga sundalo na awtorisado ng National Statistics Office para magsagawa ng sensus. AB



## Bangis ng Oplan Bantay Laya 2, gumagatong ng rebolusyon sa Bicol

**S**a isang bayan sa Bicol, ang mismong kabangisan ng Oplan Bantay Laya 2 (OBL 2) ang gumagatong sa galit at paglaban ng mamamayan sa reaksyunaryong sistema. Ibayong mga pang-aatake sa mga sibilyan at iba pang matitinding paglabag sa karapatang-tao ang ibinubunsod ng ambisyosong layunin ng OBL 2 na madurog ang rebolusyunaryong armadong pakikibaka sa lugar sa loob ng tatlong taon.

Ang idinudulot nitong matinding kaapihan at kaahirapan sa mamamayan doon ang nagtuturo sa kanila

ng pangangailangan at kawastuan ng armadong pakikibaka. Nagsisilbi ito ngayong pinakamalaking rekruter ng Bagong Hukbong Bayan (BHB) at rebolusyonaryong kilusan sa lugar at sa iba pang bahagi ng Bicol.

Noon pang 2005 ay nagsarbey na roon ang mga ahenteng paniktik ng Armed Forces of the Philippines (AFP) para matuklasan kung sinu-sino ang sumusupporta sa BHB. Nagpanggap na mga albularyo o maglalako ng kung anu-anong kalakal ang mga ahente. Ibinebenta nila nang murang-mura at hulugan ang kanilang

mga paninda para magkaroon ng dahilang magpabalik-balik sa lugar. Nang matuklasan ang tunay na katauhan ng mga kunwang maglalako, nagkaisa ang mga taumbaryo na huwag nang bumili sa mga ito. Mula noon ay hindi na bumalik ang mga ahenteng militar.

Subalit pagkalipas ng ilang buwan, nagsagawa naman ang militar ng pagesensus sa lahat ng pamamahay doon. Binilang ang myembro ng bawat pamilya para makalkula kung ilang kilong bigas daw lamang ang dapat kinukonsumo ng isang pamilya sa isang araw. Sinumang bumibili ng labis sa kalkulasyon ng nagsensus ay awtomatikong binabansagang tagasuporta ng BHB.

Sinundan ito ng pagtatayo ng mga detachment ng militar sa karamihan ng mga barangay sa bayan. May mga tinortyur at napilitang magbigay ng impormasyon. Dahil sa takot, maraming pamilya ang nagsilikas.

Malala ang idinulot na pinsala ng militarisasyon sa kabuhayan ng mamamayan. Malaki ang ibinagsak ng ani nila mula nang hindi na makapagtrabaho nang matagal sa hapon ang mga magsasaka sa pangambang pagsuspetsahan sila ng militar na nakikipag-ugnayan sa BHB kapag abutin ng dilim sa bukid.

Isa sa mga matinding pinaginitan ng mga sundalo ay si Ka George, isang kasapi ng lokal na sangay ng Partido na dati'y nakapag-aani ng hanggang 80 sako bawat ektarya. Pero mula nang hindi na siya makapag-abono at makapag-asikaso ng pananim dahil sa pagtugis sa kanya ng militar, 19 na sako na lamang ang kanyang nani. Ilang beses pinuntahan ng *death squad* si Ka George para likidihin, subalit nalulusutan niya ang mga berdugo at kinukupkop siya ng mga kasama, hanggang tuluhan na siyang sumapi sa BHB.

**ANG BAYAN** Setyembre 21, 2007



Isa pang magsasaka, si Tay Eugenio, ay dating medyo nakagiginhawa sa buhay. Bukod sa palayan ay mayroon siyang babuyan. Dating nakaka-sandaang sako siya bawat ani. Subalit inaagaw na ng militar ang karamihan ng kanyang ani at nag-iawan na lamang sa kanya ng 12 sako. Palusot ng kaaway, dadalawa lang naman daw ang anak niya, kaya hindi na niya kailangan ng mas marami pang suplay.

Ang sinumang magsumbong o magsisilbing testigo sa pagmamalupit ng militar ay pinagbabantaan at di iilan ang pinaslang na ng mga *death squad*.

Matatag na hinaharap ng masa ang lahat ng pagpapahirap sa kanila ng kaaway. Di iilan sa pinakamaiinit na lider masa at aktibista sa baryo ang sumapi na sa BHB. Ang ibang nakapananatili pa sa baryo ay nagpapatuloy sa pagkilos at nag-oorganisa pa rin ng kanilang mga kapwa magsasaka sa abot ng kanilang makakaya. Samantalang kinailangang maging higit na mainat na, walang pagbabago sa mainit pa ring pagtataguyod ng masa roon sa hukbong bayan.

Sa harap ng mahigpit na sitwasyong militar sa lugar, patuloy

pa ring nakapagmamantini ng presensya ang BHB roon. Salamat sa walang tigil na pagsuporta ng masa, nakapaglulunsad pa rin sila ng mga armadong aksyon laban sa kaaway.

Ang mga tagabaryong napilitan lamang na sumapi sa paramilitar na CAFGU o makipagtulungan sa ibang paraan sa kaaway ay kina-kausap ng BHB para manyutralisa at hindi makapagpahamak pa ng iba. Pinapaabutan sila na hindi sila itinuturing na kaaway ng rebolusyon hangga't wala silang aktwal na ginagawa laban sa rebolusyon at sa mamamayan.

Para palaging may sariwang impormasyon ang BHB hinggil sa mga plano at kilos ng kaaway, nagsasagawa ng kontra-paniktik ang taumbaryo, pangunahin na ang mga myembro ng lokal na sangay ng Partido at mga organisadong magsasaka. Dumadalo sila, halimbawa, sa sayawan na pinupuntahan ng mga sundalo at mga karagkarag ng mga ito. Habang panay ang pag-iinom ng mga ito, sila mismo'y di umiinom. Kapag nalasing na ang mga kaaway at nagdadaldal na, masusi nilang pinakinggan ang mga kwentuhan para maiulat nila ito sa BHB.

## Mga bayaning medik ng bayan

**L**abis-labis ang hinagpis ng mamamayan ng Cagayan Valley nang tatlong medik—sina Ka Maliw, Ka Ryza at Ka Guiller—ang nagbuwis ng buhay nitong Hulyo 30. Sila ay pawang mga upisyal medikal ng Bagong Hukbong Bayan. Napatay sila nang salakayin sila ng mga elemento ng 52nd Recon Coy habang nagsasagawa ng isang *medical mission* sa Barangay Cadsalan, San Mariano, Isabela.

Ang naturang baryo ay kabilang sa mga liblib na lugar na sinasalanta ngayon ng malarya. Tuluy-tuloy na lumalala ang epidemya doon laluna sa harap ng pagpapabaya sa kanila ng guberno at sa maramihang pagpapasara ng mga ospital sa prubinsya. Kaya naman sabik na sabik ang mga naninirahan doon sa planong *medical mission* ng mga kasama. Labis-labis ngayon ang kanilang galit nang salakayin ng mga pasistang elemento ng militar ang *medical mission* ng BHB.

Binigyang-pugay bilang mga martir ng sambayanan at rebolusyong Pilipino ang mga manggagamot ng masa na sina Katrina Zapanta (Ka Maliw), Mayline Gubat (Ka Ryza) at Janzel Zeta Arnato (Ka Guiller).

Si Katrina Zapanta ay nagmula sa panggitnang saray ng uring petiturgis. Tubo siyang Antipolo, Rizal at nag-aral sa Polytechnic University of the Philippines. Napabilang siya sa Kabataang Makabayan na nagtaas ng kanyang rebolusyonaryong kamulatan. Oktubre 2006 nang siya ay magpasyang tumungo sa kanayunan at makisalamuha sa mga magsasaka. Punungpuno siya ng optimismo at mataas ang moral.

Sa kabila ng maselang balat at hirap sa paglalakad, itinuloy niya ang kanyang hangarin na maging mandirigma. Natupad ang kanyang pangarap na maging duktur ng bayan nang maitalaga siya sa panrehiyong istap medikal. Bilang medik, nilapat niya ang kanyang mga

natutunan kaugnay ng kalusugan upang magbigay ng serbisyong medikal sa mga magsasaka at mga Pulang mandirigma. Malaki rin ang kanyang naging ambag sa gawaing pangkultura dahil sa kanyang pagiging malikhain.

Si Mayline Gubat o mas kilala bilang Ka Ryza, ay nagmula sa minoryang Aggay. Nasaksihan niya sa kanilang lugar ang talamak na panggigipit at diskriminasyon ng mga asendero at panunupil ng militar sa mga Aggay. Sa hirap ng buhay ay maaga siyang tumulong sa kanyang mga magulang na magsaka at magtanim ng palay, mais at saging. Kalauna'y napilitan siyang pumasok bilang katulong sa murang edad.

Hindi nagtagal ay umalis siya dahil sa pagmamaltrato ng kanyang amo. Sa pagbabalik niya sa kanilang lugar ay narekluta siya bilang Pulang mandirigma. Sumapi siya sa BHB noong Oktubre 2006. Matiyaga siyang nag-aral ng gawaing medikal kahit limitado ang kanyang pormal na edukasyon. Isa siya sa mga dumagan sa

pagsasanay kaugnay ng kampanyang antimalarya at gawaing medikal na inilunsad sa rehiyon noong 2006. Madali siyang natuto at isinapraktika niya ang kanyang kaalaman sa mga nangangailangang magsasaka at kapwa niya Aggay. Dahil sa kanilang panggagamot, naging mainit ang pagtanggap sa mga mandirigma ng mga katutubong Aggay sa iba't ibang lugar.

Si Janzel Zeta Arnato o mas kilala bilang Ka Guiller ay nagmula sa panggitnang saray ng uring petiturgis. Kumuha siya ng kursong Engineering sa Adamson University sa Maynila at narekrut sa kilusang lihim. Makalipas ang isang taon bilang aktibistang masa ay tumungo siya sa kanayunan upang makisalamuha sa masang magsasaka at matapos ang isang buwan ay nagpasyang kumilos nang buong panahon bilang Pulang mandirigma.

Kalaunan ay mas nakilala siya bilang "*doktora*" ng mga kapwa mandirigma at mga magsasaka nang siya'y itatalaga sa gawaing medikal. Bukod sa mga batayang pagsasanay, nakapag-aral na rin siya ng *advanced acupuncture*. Dumalo rin siya sa *anti-malaria training* at *medical machinery building training*. Itatalaga siyang upisyal medikal sa platoon noong







2004 at nagsilbing timlider ng panrehiyong istap medikal.

Ipinakita rin ni Ka Guillen ang kanyang husay sa gawaing pang-kultura. Bukod sa sumusulat ng tula, siya ay umaawit, sumasayaw at lumalahok sa mga dula na sumasalamin sa pakikibaka ng mamamayan. Isa rin siya sa pinakamahuhusay na nagtapos ng pag-sasanay pulitiko-militar sa rehiyon.

Maniningning na halimbawa sina Kasamang Maliw, Ryza at Guillen ng pagpapahalaga ng BHB sa gawaing medikal bilang bahagi ng pagsusulong ng rebolusyon. Isinabuhay nila ang hangarin ng BHB na magbigay ng isang kinakailangang batayang serbisyo sa malawak na hanay ng mamamayan, laluna sa mga lugar na pinakapinabayaan ng reaksyunaryong gubyrno. Dahil dito, lalong humihigpit ang pagkakaisa ng mga magsasaka at ng BHB at lalong lumalalim ang kanilang suporta sa rebolusyon.

Tunay na huwaran at bayani ng sambayanan sina Ka Maliw, Ka Ryza at Ka Guillen. Magpapatuloy ang kanilang simulain sa mga Pulang mandirigmang walang sawang naglilingkod sa mamamayan. AB


## Ekonomya ng US, patungo sa panibagong resesyon

**B**inabayo ngayon ang US ng lumalawak at sumisidhing krisis sa pinansya at ekonomya. Bunsod ito ng pagputok ng bula sa negosyo ng pabahay sa US at pagbagsak ng kaakibat nitong negosyo sa pagpapautang nitong huling tatlong taon. Ito ngayon ang pangunahing salik sa pagtumal ng ekonomya sa US na nagbabadyang tuluyang sumadsad sa resesyon sa 2008.

**Ang bula ng pabahay.** Ang tinataguriang “bula ng pabahay” sa US ay pumapatungkol sa pagpapalarga ng malawakang konstruksyon ng mga bahay at mga kaakibat nitong negosyo sa pamamagitan ng todo-todong pagluluwag at pagpapababa ng interes sa pautang. Mabilis itong nagbunsod ng implasyon, o malakihan at tuluy-tuloy na pagtaas ng mga presyo. Partikular na tumaas ang presyo ng mga bahay nang labis-labis sa aktwal na halaga ng mga ito. “Pumutok” ang bula nang tumindi na ang implasyon, muling tumaas ang interes, dumami ang di makapagbayad ng utang, nangalugi ang mga sangkot na kumpanya hanggang bumagsak na ang mga ito at naging matumal na ang konstruksyon para sa pabahay.

Nagsimulang bumula ang negosyo ng pabahay sa US noong 2001. Tinatayang ito na ang “pinakamalaking bula” sa kasaysayan ng US. Sadyang pinabula ito ng rehimeng Bush sa layuning ibangon ang ekonomya ng US na nasa resesyon noon dulot ng pagbagsak ng industriyang *high-tech* noong 2000-2001.

Sunud-sunod na pinababa ng gubyrno ang interes sa mga pau-



tang sa pabahay. Mula 2000 hanggang Hunyo 2004, ibinagsak ang interes sa mga pautang na *subprime*, laluna sa mga unang taon ng pagbabayad. Target ng ganitong mga pautang ang karaniwang mamamayan na walang kakayahang makapagpatayo ng sariling bahay. Nagsisilbing kolateral sa pautang ang mismong bahay na ipinatatayo nila.

Sumikad ang pautang na *subprime* nitong nagdaang mga taon dahil sa napakababang interes. Naengganyo ang marami na umutang dahil ibinagsak ang interes mula 8.5% tungong 5.5%, na siyang pinakamababa na sa buong kasaysayan ng US.



Bunga nito, maraming kumpanyang pumasok sa pag-aalok ng pautang na *subprime*. Karamihan ng mga umutang ay mahihirap na walang kakayahang makapagpatayo ng bahay at walang mahusay na rekord sa pagbabayad ng mga utang, pero naengganyong umutang dahil sa alok na mabababang interes sa mga unang taon ng pagbabayad.

Sa mga sumunod na taon, artisipyal na pinasikad ng gayong pagpapautang at maramihang konstruksyon ng mga bahay ang ekonomya ng US—na halos sangkapat ay nakasalalay sa pribadong konstruksyon. Mahigit 40% ng mga nalikhang pansamantalang trabaho ay para sa konstruksyon ng mga bagong bahay at mga kakibat na negosyo.

Ang maluwa at mababang interes sa pautang para sa pabahay ay sinamantala ng mga ispekulador—mga negosyanteng nangutang nang nangutang lampas sa kakayahan nilang magbayad upang makapagpatayo ng maraming bahay sa paniniwalang maibebenta nila ang mga ito sa hinaharap sa mataas na presyo o maipauupa sa higit na mataas na halaga. Sa kanila napunta ang halos sangkapat ng mga pautang para sa pabahay.

Naglitawan din ang iba pang susong ng mga nagpapautang, mga tagapamagitan at iba pang nagnais makabahagi sa malaking ganansya. Sa loob ng tatlong taon, tumaas nang 200% ang pautang para sa pabahay at iniluwal nitong iba pang pangungutang.

**Epekto sa mamamayan.** Sa paglobo ng bula ng pabahay, sumirit ang presyo at upa ng mga bahay. Walang katulad sa nakaraan ang tuluy-tuloy na pagtaas sa presyo ng mga bahay. Taun-taon,

umakyat nang minimum na 10% ang presyo ng mga ito. Sa loob ng anim na taon, tumaas nang mahigit 50%-60% ang presyo ng pabahay sa iba't ibang lugar. Umabot ito nang 80-100% sa San Diego, Los Angeles, Denver, Boston at New York City kung saan pinakamalaki ang paglobo.

Dahil sa pagsirit ng presyo ng bahay, tuluytuloy na nahirapan ang mga bumili o nangupahan sa mga bahay na itinayo, ipinagbili o ipinaupa ng mga ispekulador. Karamihan ng mga umutang na wala naman talagang kakayahang magbayad ay nalubog sa pagkakautang. Inabot na ng halos \$100 bilyong dolyar ang di mabayaranang utang sa buong US.

Para kontrolin ang implasyon, hinigpitan naman ng guberno ang pagpapautang. Labimpitong ulit na itinaas ng rehimeng Bush ang interes sa pautang hanggang sa mahigit 100% ang inilaki nito. Mula sa 5% interes sa pautang sa pabahay noong mga unang taon ng bula, umabot ito sa 13%. Bunga nito, bumagsak ang konstruksyon ng mga bahay noong 2005 at tumumal na mula noon.

Samantala, dumami nang dumami ang mga narematang bahay mula sa mga dati nang hirap magbayad ng utang at lalo pang nahirapan nang ibayong tumaas ang interes. Pagsapit ng 2006, umabot na sa 1.2 milyon ang narematang bahay. Tinatayang sa susunod na dalawang taon ay aabot sa 1.1 milyon pa ang mawawalan ng bahay.

Kaalinsabay nito, dumami ang bilang ng mga walang hanapbuhay sa US dahil sa sunud-sunod na pagkalugi at pagsasara ng mga



kumpanyang nagpapautang at pagtumal na ng konstruksyon sa pabahay. Nawalan ng trabaho ang umaabot sa isang milyong kaswal na manggagawa sa konstruksyon at iba pang negosyo sa manupaktura at komersyo kaakibat ng pabahay. Umabot na sa 4.6% ang tantos ng walang hanapbuhay at mahigit anim na milyon pa sa buong US ang nanganganib na matanggal sa trabaho.

**Epekto sa mga kumpanyang nagpapautang.** Sumabog ang bula sa pabahay at pautang nang mangalugi ang marami sa mga kumpanyang nagpautang para sa pabahay. Mula 2006, mahigit na sa 100 ganitong kumpanya ang nagdeklara ng pagkabangkrap at tuluyang nagsara.

Tinatayang mahigit \$90 bilyon na ang ikinalugi ng mga kumpanya sa pagpapautang para sa pabahay. Ang Countrywide Financial Corp., pinakamalaking kumpanyang nagpapautang para sa pabahay sa US ay dumanas ng 84% na pagkalugi. Naisalba lamang ito sa pagkabangkrap nang suhayan ito ng \$11 bilyon mula sa 40 bangko. Nabangkrap din ang New Century Financial Corp, pangalawa sa pina-



kamalaking kumpanyang nagpapautang ng *subprime* sa US.

Dahil nakataya nang malaki sa *stock market* (pamilihan ng mga sapi) ang marami sa mga kumpanya sa pautang, malaki ang ibinagsak ng halaga ng mga sapi ng mga negosyong ito. Nagdulot ito ng serye ng mga pagdausdos sa *stock market* ng US.

**Walang katuturang mga "solusyon."** Sa desperasyong muling itulak ang konstruksyon sa pabahay at mapasigla ang naghihi-ngalong ekonomya ng US, ibinaba na naman nitong Setyembre sa 5.61% ang interes sa mga pautang na *subprime*. Nangangarap ang rehimeng Bush na muli nitong eengganyuhin ang pangungutang at konstruksyon.

Subalit duda ang mga ekonomista kung mapasisigla pa ng ganitong hakbangin ang matumal na ekonomya ng US. Una, dahil sa masamang karanasan ng mga bumili ng mga papeles sa pautang at mga bono na inilalako ng mga kumpanya sa US, hindi na ito madaling ibenta. Ikalawa, sa takot na maulit ang malawakang pagkalugi, mahigpit na itinatali ngayon ng mga kumpanyang nagpapautang ang kalakhan ng kanilang pondong pautang (\$2 trilyon) sa tiyak at matibay na mga kolateral.

Samantala, itinuturing nang mababang klase ng salapi ang dolyar ng US dahil sa patuloy na paghina nito kumpara sa salapi ng ibang kapitalistang bansa, laluna kumpara sa *euro*. Kumpara sa dolyar ng US, mas gusto na ng mga negosyante at mamumuhunan ang *euro* at maging ang *renminbi* ng China. Noong 2002 ay magkapantay lamang ang halaga ng *euro* at dolyar. Mataas na ngayon nang 39% ang halaga ng *euro*. AB

## Hatak ng krisis sa US sa pandaigdigang kapital

**A**ng buong pandaigdigang sistemang kapitalista ay hinahatak sa resesyon ng krisis sa pinansya at ekonomya sa US.

Parang apoy na kumakalat sa iba't ibang bahagi ng mundo, pangunahin na sa mga imperyalistang bansa, ang pagputok ng bula sa pabahay at pautang sa US. Ito ay dahil maraming malalaking pandaigdigang bangko at pampinansyang kapitalistang nakabase sa Germany, France, United Kingdom at ibang imperyalistang bansa ang pumasok at nangalugi sa negosyo ng pabahay sa US.

Sa United Kingdom, iniulat ng HSBC Holdings (pangatlo sa pinakamalaking pampinansyang kumpanya sa buong mundo) noon pang Pebrero na nakapagluwal ito ng \$10.24 bilyon na ipinambili ng mga papeles sa utang ng may 250 kumpanya sa US na nagpapautang para sa pabahay. Naglaho ang halagang ito nang pawang nagkalugi-lugi ang mga kumpanyang ito sa pagputok ng bula ng pabahay sa US. Karagdagan ito sa nalugi ring \$15.5 bilyon na ipinambili nito sa Household International Inc. para magamit bilang behikulo sa pagpapautang para sa pabahay sa US.

Nitong Hunyo, sinuspinde ng BNP Paribas (pinakamalaking bangko sa France at sa buong European Union) ang tatlong malalaking kumpanyang pampondo nito na nalugi nang malaki sa pagpapautang para sa pabahay sa US. Hanggang ngayon ay di pa nito inilalahad ang kabuuang pagkalugi ng tatlong kumpanya.

Sa Germany, ang IKB Deutsche Industriebank ng Germany ay nag-ulat noong Hulyo na

\$10.6 bilyon ang naipuhunan nito sa pagpapautang sa pabahay sa US. Isa pang bangko sa Germany, ang WestLB ay namuhunan naman doon ng \$1.7 bilyon.

Mula sa US, tumawid sa United Kingdom ang krisis sa negosyo sa pabahay at pagpapautang para rito. Nitong mga huling araw lamang sumambulat ang krisis sa kawalang tiwala ng mga mamumuhunan at mga depositor sa Northern Rock, ikalimang pinakamalaking kumpanyang British na nagpapautang para sa pabahay sa UK. Sa pangambang naapektuhan na ito ng krisis sa *subprime loans* para sa pabahay sa US, madalian at maramihan nang inilalabas ng mga depositor ang kanilang mga deposito sa kumpanya. Sa loob pa lamang ng ilang araw, mahigit £2 bilyon (\$4 bilyon) na ang nailabas na mga deposito kaya na obligang saklolohan ito ng Bank of England. Dumanas ng serye ng pagbagsak ang halaga ng mga sapi ng Northern Rock na sinundan ng pagbagsak din ng halaga ng mga sapi ng iba pang malalaking bangko sa UK. Nagdulot din ito ng matinding pagbagsak ngayon ng negosyo sa pabahay sa UK.

Mula nitong Agosto, kasunod ng serye ng mga pagsadsad ng *stock market* sa US, dumanas din ng mga pagbagsak ang mga pangunahing *stock market* sa iba't ibang bahagi ng daigdig. Bawat balita ng pagkalugi ng ilan sa pinakamalalaking bangko at pampinansyang kapitalista sa Europe, tulad ng IKB Deutsche Industriebank, BNP Paribas, HSBC Holdings at Northern Rock ay nagbubunsod ng matitinding pagbagsak sa *stock market* sa Europe,

bukod pa sa mga bayang kinalalagyan ng mga ito. Ilang bilyong dolyar na ang nawawala sa halaga ng mga sapi ng mga indibidwal at institusyon, kabilang ang mga pondo sa pensyon at seguro.

Sa Pilipinas, bumagsak din ang *stock market* nitong kalagitnaan ng Agosto. Naglaho ang P260 bilyon sa pamilihan sa dalawang araw na pagbagsak sa halaga ng mga sapi sa bansa. Biglang nawala ang ipinagmamalaki ni Arroyo noong Disyembre na paglago umano ng *stock market* sa bansa.

Bilyun-bilyong dolyar ngayon ang ipinapasok sa sistemang pampinansya ng mga mayor na bangko sentral sa buong mundo. Layunin nitong paluwagin ang pagpapautang, ibalik ang kumpanya sa kapitalistang sistema sa pinansya at pigilan ang lalong paglala ng krisis ng pandaigdigang sistemang kapitalista.

Nitong Agosto, umabot sa 250 bilyong *euro* (katumbas ng \$350 bilyon) ang naipasok ng European Central Bank sa mga bangko sa Europe. Mahigit \$74 bilyon ang naipasok na ng US Federal Reserve sa mga bangko sa US at \$8.4 bilyon ang naipasok ng Bank of Japan sa mga bangko sa Japan.

Gayunpaman, bahagya at pansamantala lamang ang idinudulot nitong muling pagpapasigla sa kapitalistang sistema. Lalo lamang nitong ipinakikita ang bigat ng krisis ngayon ng pandaigdigang kapitalistang sistema sa pinansya at ekonomya.

Ang mga hakbang na ito ay hindi na makapigil sa paghantong ng tumitinding pandaigdigang krisis sa pinansya at ekonomya sa panibagong pandaigdigang resesyon. **AB**

## JPEPA, ipinababasura

NAGPIKET ang mga myembro ng Bagong Alyansang Makabayan (BAYAN) sa harap ng Senado para tutulan ang Japan-Philippines Economic Partnership Agreement (JPEPA). Ihinalintulad ng BAYAN sa pangalawang pananalakay ng Japan ang naturang kasunduan kung ito ay maaaprubahan.

Ayon sa kasunduan, magiging tambakan ng sobrang produkto ng Japan ang Pilipinas at tatanggalin lahat ng buwis na ipapataw sa mga produktong ito liban sa bigas at asin. Ultimong mga nakalalasong basura at iba pang basura mula sa mga pabrika ng Japan ay itatambak sa Pilipinas.

Kapalit nito ay mag-eeksport ang Pilipinas ng mga produktong agrikultural tulad ng saging at pinya. Gayunman, hindi basta-basta makapapasok ang mga produktong agrikultural sa Japan dahil sa mahigpit na mga pamantayang ipinatutupad ng guberno ng Japan sa ganitong mga produkto.

Ayon pa sa BAYAN, ilusyon din ang sinasabing makapapasok ang mga Pilipinong nars sa Japan dahil sa JPEPA. Bago makapagtrabaho sa Japan, kailangan munang makapasa sa eksamen ang mga aplikante hinggil sa Nippongo, ang wika ng Japan.

## Pakanang amnestiya, daluyan ng korapsyon

MARIING tinanggihan ng Partido Komunista ng Pilipinas (PKP) ang Presidential Proclamation 1377 na naglalaan ng P500 milyon para umano sa "*amnesty program*." Sa isang pahayag, sinabi ni Gregorio "Ka Roger" Rosal, tagapagsalita ng Partido, na walang kwentang gimik ang programang ito, maliban na lamang sa mga korap na upisyal ehekutibo, panseguridad at militar ni Arroyo na naglalaway sa pondo nito.

Idinagdag ni Rosal na kabisadong-kabisado na ng mga namumunong upisyal ng rehimeng Arroyo at ng Armed Forces of the Philippines (AFP) kung papaano mapagkakakitaan ng limpak-limpak ang luma at walang silbing mga armas na paulit-ulit na isinasalong ng mga pekeng surenderi. Malawakang korapsyon, aniya, ang kaakibat ng "*rebel-returnee program*" at "*balik-baril program*" na ipinauso noon ng rehimeng Ra-

mos.

Ngayo'y planong isanib ang "*social integration program funds*" sa "*amnesty program*" para magkaroon ng mas malaking pondong hindi na inaawdit at libreng-libreng kurakutin ng Malacañang at AFP, ani Rosal.

Idinagdag niya na magkakaro-on ng sunud-sunod na mga huwad na pagpapasurender para maibulsa ng militar at iba pang upisyal ng rehimen ang perang nakalaan sa bawat sumusukong rebelde at isinalong na baril.

Samantala, binatikos din ng PKP ang plano ng rehimeng Arroyo na ipamahagi umano ang pondong pang-amnestiya sa mga lokal na kadre ng Partido at kumander ng Bagong Hukbong Bayan na makikipagnegosasyon sa gubernong Arroyo. Anang PKP, walang papayag dito kaya lalabas na kakausapin lang ng guberno ang sarili nito.

## Mga upisyal-militar, di pinadalo sa Senado

TANGING si T/Sgt. Vidal Doble, dating ahente ng Intelligence Service of the Armed Forces of the Philippines (ISAFP) ang sumipot sa imbestigasyong "Hello Garci" na binuksan noong Setyembre 7. Pinigilan ng rehimen ang pagdalo ng 10 pang sundalo at upisyal militar sa Senado gamit ang E.O. 464. Hindi rin sumipot sina Samuel Ong, Virgilio Garcillano at iba pang susing indibidwal na sangkot sa kaso.

Salit-salitang binanatan si Doble ng mga maka-administrasyong senador na sina Juan Ponce Enrile, Joker Arroyo at Richard Gordon hinggil sa pagbabago ng kanyang mga testimonya sa Kongreso, sa Court of Appeals at ngayon sa Senado. Inamin naman ni Doble na nagsinungaling siya noon dahil iyon ang atas sa kanya ng mga nakatatasa na upisyal ng militar at dahil na rin sa takot.

Sa pangalawang pagdinig nitong Setyembre 17, hindi lumitaw sina Press Secretary Ignacio Bunye, National Security Adviser Norberto Gonzales, Undersecretary Remedios Poblador at tatlo pang upisyal militar. Sa pagkakataong ito, isa pang maka-administrasyon na senador, si Miriam Santiago ang gumisa kay Doble. Personal niyang inatake ang pagkatao ni Doble na malinaw na paninirang-puri lamang at walang relasyon sa imbestigasyon.

Nakatakdang sampahan ng Senado ng kasong *contempt of court* o pagsuway sa atas ng korte ang mga upisyal ng gobyerno na hindi dadalo sa mga ipinatawag nitong mga pagdinig.

## Pilipinas, mag-aangkat ng \$20 milyong bigas sa US

INAPRUBAHAN ng Agriculture Department ng United States noong Setyembre 10 ang pag-aangkat ng Pilipinas ng \$20 milyon ng US *long-grain rice*. Aangkatin ito mula Nobyembre 1-30. Katumbas ito ng 40,000-50,000 tonelada ng bigas.

Tinututulan ng mga grupong magsasaka ang pag-aangkat ng bigas mula sa US dahil kalakhan ng bigas na ibinebenta ng nasabing bansa ay mga lahing tinatangihan na sa US mismo at ng ibang bansa dahil sa mga peligrong dulot nito sa kalusugan at kalikasan. Sa pag-aangkat na ito, itatambak sa Pilipinas ang bigas na may *Liberty Link*, na ineksperimento ng Bayer Crop Science sa palay para di ito tablan ng mga pamataydamong likha rin ng naturang kumpanya.

## Blackwater, pinalalayas sa Iraq

PINALALAYAS ng mga Iraqi ang mga mersenaryong tropa ng Blackwater matapos nila paulanan ng bala ang isang mataong lugar sa Iraq na ikinamatay ng pitong sibilyang Iraqi noong Setyembre 16. Isa ring pulis na Iraqi ang namatay nang saklolohan niya ang mga binabaril na sibilyan. Bukod sa kani-la ay 13 sibilyang Iraqi rin ang nasugatan sa naturang pamamaril.

Naganap ang walang pakundangang pamamaril matapos umano paputukan ng mortar ng mga gerilyang Iraqi ang isang komboy ng mga empleyado ng US *embassy* sa Baghdad. Sumabog lamang malapit sa komboy ang mortar at walang nasaktan sa mga empleyado ng *embassy*.

Ang Blackwater, isa sa pinakamalalaking kumpanyang nagsusuplay ng mga mersenaryo, ay kinontrata ng US para magbigay-seguridad sa mga Amerikano sa Iraq.

Iniutos ng rehimen ng Maliki ang pagtigil ng mga operasyon ng Blackwater sa Baghdad at pagrebyu sa lahat ng kontrata ng mga pribadong mersenaryong ahensyang panseguridad na nagbibigay-proteksyon sa mga negosyante at empleyadong dayuhan, partikular na sa mga Amerikano. Iginigiit din ng mga diputado sa parlamentong Iraqi na kasuhan ang mga namaril na mersenaryo.

Tinatayang may 180 pribadong ahensyang panseguridad na nag-eempleyo ng mahigit 100,000 mersenaryo ang nasa tinatawag na Green Zone, isang gwardyadong lugar sa Baghdad kung saan tumitira ang mga mamamayan ng US at iba pang bansa. Ang mga mersenaryong ito ang nagbibigay ng proteksyon sa mga negosyante, tauhan ng mga embahada at kahit sa mga tropa ng US kapag sila ay lumalabas sa Green Zone tungo sa ibang lugar sa Iraq. Matatandaang maraming Pilipino ang ineempleyo ng mga ahensyang ito upang bigyang-proteksyon ang mga Amerikanong sibilyan at sundalo.

Kaiba sa mga sundalo ng pwersang okupasyon na pwedeng kasuhan ng mga krimen sa ilalim ng mga internasyunal na batas sa digma, hindi malinaw ang mga kasong maaaring isampa laban sa mga mersenaryo. Marami nang naitalang kaso ng pamamaril sa mga sibilyan ang mga ito nang hindi na naisasalang sa korte. Kung saka-sakali, ang Blackwater ang unang kumpanyang mersenaryong makakasuhan sa mga korteng Iraqi.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXVIII Blg. 18  
Setyembre 21, 2007  
www.philippinerevolution.org

*Editorial*

# Sukdulan ang galit ng mamamayan sa pandarambong ng rehimeng US-Arroyo

**A**bot-langit na ang galit ng mamamayang Pilipino sa rehimeng US-Arroyo. Sa kabila ng sagad-sagarang kahirapan ng mamamayan, pagkasaid ng yaman at pagkasadsad ng ekonomya ng bansa, walang kabusugan ang pandarambong at labis-labis na ang pagpapakabundat ng pamilyang Arroyo, kasabwat ang malalaking burukrata ng rehimen at dayong malalaking kapitalista.

Lalo pa ngayong nagtutungan ang apoy ng galit ng bayan sa pagpasok ng kampong Arroyo sa labis na maanomalyang kontrata sa National Broadband Network (NBN) at pagbalsa nito ng \$130 milyong suhol mula sa ZTE Corporation ng China.

Ang \$329 milyong kontratang NBN ang isa na sa pinakamalalaking kaso ng korapsyon. Sinasapawan nito ang napakarami nang malalaki ring kaso ng pangungulimbat sa kabang-bayan: mula sa pagtanggap ng \$14 milyong kikbak sa IMPSA-Caliraya Project hanggang sa pangungurakot sa konstruksyon ng P1.1 bilyong Diosdado Macapagal Boulevard at sa paglilimas ng P2.8 bilyong pondo ng Ginintuang Masagang Ani Program.

Katulad ng maraming kaso sa nakaraan, tuwirang sangkot si Gloria Arroyo sa kontratang NBN, gamit ang kanyang asawang si Mike. Kahati rin nila ang ka-


nilang pinakamalalapit na matataas na upisyal na tumanggap ng kani-kanyang bahagi ng suhol. Pangunahin dito ang pinuno ng COMELEC na si Benjamin Abalos, at mga upisyal ng gabinete.

Sa paglubog ng naghaharing sistema sa palalim nang palalim na krisis, lalong nagiging

hayok ang naghaharing kampong Arroyo sa pangungulimbat. Daig na nito ang lahat ng mga kaso ng paganakaw sa nakaraan. Nagkukumahog itong samsamin ang lahat ng pwede nitong samsamin habang nakaupo sa Malacañang at gamitin ang lahat ng kapangyarihan para tumagal pa sa poder at lalo pang makapangulimbat.

Ang walang kasapatang kahayukan ng naghaharing rehimeng Arroyo sa pandarambong ay palatandaan ng papakitid na pakinabang na napipiga ng mga naghaharing uri dulot ng lalong tumitinding krisis at paglilimas sa kayaman ng bayan. Hindi na ito maaaring payapang paghatian ng mga reaksyunaryong kampong nakaupo at wala sa poder.

Maging ang mismong mga alipures ni Arroyo ay walang tigil na sa girian sa pagbubulsa ng pinakamalalaking pakinabang. Kitang-kita ito sa pag-uunahan ng malalaking burukratang kaalyado ni Arroyo sa kani-kanyang pagbubulsa ng bilyun-bilyong pisong suhol para maitulak at mailusot ang maanomalyang



***Mga tampok sa isyung ito...***

**Proyektong NBN:  
patung-patong  
na kurakot** PAHINA 4

**Paglaya ni Ka Joema,  
malaking sampal  
kay Arroyo** PAHINA 5

**Ekonomya ng US  
patungong resesyon** PAHINA 9

## Mga instruksyon sa paglilimbag

**1.** Ang **pahina 11**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)